

**Kuasa mutlak menteri digugur  
Utusan Online  
19 April, 2012**

KUALA LUMPUR 18 April - Rang Undang-Undang Akta Mesin Cetak dan Penerbitan (Pindaan) 2012 yang bertujuan untuk menggugurkan 'kuasa mutlak' menteri dalam melulus atau menolak mana-mana lesen mesin cetak dibentang untuk bacaan kali pertama di Dewan Rakyat, hari ini.

Rang undang-undang yang dibentangkan oleh Timbalan Menteri Dalam Negeri, Datuk Wira Abu Seman Yusop itu merupakan pindaan kepada Akta Mesin Cetak dan Penerbitan 1984 (Akta 301).

Antara pindaan yang dibuat adalah terhadap subseksyen 3(3) Akta 301 bagi memansuhkan kuasa 'budi bicara' menteri dalam memberi atau menolak pemberian lesen mesin cetak serta kuasa untuk menentukan tempoh sah lesen berkenaan.

Pindaan juga dibuat bagi subseksyen 6(1) Akta 301 iaitu memansuhkan kuasa 'budi bicara yang mutlak' bagi menteri dalam memberi kebenaran kepada seseorang untuk mencetak, menerbitkan akhbar di Malaysia atau mengeluarkan permit kepada mana-mana pemilik akhbar di Singapura supaya membolehkan akhbar terbitannya diimport, dijual atau diedar di Malaysia.

Menurut rang undang-undang tersebut, lesen atau permit yang telah diberikan di bawah Akta itu adalah kekal sah mengikut tempoh yang diberikan selagi tidak dibatalkan.

Pindaan turut dibuat kepada subseksyen 13A(1) Akta 301 bagi memansuhkan larangan semakan kehakiman ke atas keputusan menteri untuk memberi, enggan memberikan, membatalkan atau menggantung sesuatu lesen atau permit.

Selain itu, pindaan juga dibuat bagi memberi seseorang itu peluang didengar sebelum keputusan untuk membatalkan, menggantung lesen atau permit dibuat.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0419&pub=Utusan\\_Malaysia&sec=Muka\\_Hadapan&pg=mh\\_01.htm](http://www.utusan.com.my/utusan/info.asp?y=2012&dt=0419&pub=Utusan_Malaysia&sec=Muka_Hadapan&pg=mh_01.htm)